

Parlamentario Rocco Tjon

# Caft ta co-responsable riba situacion financiero di Aruba y Rekenkamer di Hulanda a señala esaki tambe

ORANJESTAD (AAN): Lider di fraccion di MEP, parlamentario Rocco Tjon a bisa cu aworaki a yega den un fase caminda pa keda discuti pa kico e deficit tabata, si tabata 3 of 5 por ciento, kico a wordo hereda ta tras di lomba. Caft a papia bon cla den diferente reunionnan, entre otro, reunionnan cu no tabata den parlamento mes, kico e debe ta cu gobierno actual a hereda.

E ta kere a bira momento pa wak padilanti y cuminsa mehora e situacion. Pa mehora e situacion, e unico cos cu pais Aruba ta pidi ta tempo y espacio pa nos mes mehora e situacion financiero di Aruba. Den esaki, parlamento tin un rol hopi importante y pesey nan a entrega un mocion cu den Augustus awo, Gobierno actual mester bin parlamento pa duna nan un relato pa nan wak con a para cu recursonan cu a wordo aproba durante presentacion di presupuesto, specialmente den caso cu ta necesario pa haci cierto adaptacion si e situacion ta rekeri esaki.



E parlamentario a bisa cu ta importante, y esey ta e señal cu nan lo bisa Caft diabierna awo, cu nan no mester lubida y nan a enfatiza durante un reunion den Rekenkamer na Hulanda dos siman pasa, cu Caft ta co-responsable riba situacion financiero di Aruba. Pasobra nan supervision a faya y Rekenkamer di Hulanda a señala esaki tambe. Sin embargo tin un diferencia si, Rekenkamer den su concepto kier muestra como si fuera cu Caft no tabata tin suficiente 'tools' pa por interveni y nan no ta di acu-

erdo cu esaki. Tjon a bisa cu Caft tabatin tur tools pa interveni!

Actualmente, pa prome biaha Caft a bisa cu tin un paso significativo na un bon caminda, kiemen nan ta wak cu awo no ta haci uso di entrada irealistico, sin

embargo nan ta keda stress riba hecho cu esaki no ta suficiente. Mester corda cu Aruba no ta pasando solamente den un crisis financiero, sino un crisis social, cu Hulanda mes a acepta cu ta asina, pasobra sino nan no lo yuda den e plan di crisis.

Tjon ta enfatiza cu e manera con Caft a wordo institui tabata contra tur regla y procedura, y fraccion di MEP no ta acepta pa esaki sigui tuma lugar. Si mester yega na extende e supervision, nan lo bisa Caft y Secretario di Estado di Hulanda, Knops, nan lo haci esaki segun reglanan cu ta conta den un pais democratico. Ta inacceptable cu Secretario di Estado kier yega na palabacionnan, manera a sosode den pasado, caminda

si no extende of si no yega na cierto acuerdonan, ta bin aanwijzing.

Tjon a expresa cu e no a drenta politica pa wordo menaza pa ningun mandatario cu lo bin un aanwijzing, si esaki tuma lugar, dal bay, pero e kier sa a base di kico. E tipo di weganan aki mester stop. Ciudadanonan di pais Aruba a wordo perhudica suficientemente door di Caft y door di actitud di Rijksministerraad pa loke ta trata situacion financiero.

Si Rijksministerraad y Caft lo asumi nan responsabilidad algun aña pasa, Aruba no lo ta den situacion financiero actual, segun Tjon. Caft y Hulanda mester cuminsa respeta democracia den otro paisnan, pasobra nan actitud ta inacceptable.